



Fasnacht 2007

Sujet: **Het Prattele jetzt e Schiibe ?**

Liebi Lüt am Strosserland
passet uf was mir euch z`brichte händ
hebet d`Auge uf und d`Ohre spitzig
was in Prattele lauft isch scho witzig
mängmol trurig froglich oder famos
doch öbis isch jo immer los
drum wämers a dere Fasnacht woge
und düend Euch eifach mol öbis froge
es reizt sehr und isch guet zum beschreibe

Het Prattele jetzt e Schiibe ?

was das soll heisse cha sich jeder denke
und es duett uf verschiedeni Sache lenke
will e Schiibe ha heisst jo schlicht
uf guet dütsch nit ganz dicht.

Jetzt fangemer a mit ummeprahle
und grad als ersts mit de Dorfturnhalle
endlich händ sis in Prattele grafft
und die Renovation isch gschaft
jetzt strahlt die Halle in neuem Glanz
und me macht en Freudetanz
aber nei was müessemer au gseh
ich glaub uns machet d`Auge weh
denn willsch vo dusse in die Halle inne
muesch neuerdings durch die Glasvitrine
oder solls doch eher es Gwächshuus sie?
oder wird`s ufgfüllt mit Wasser und Fischli
uf jede fall duett mer uns Prattler nit benide
denn alli froge: **Het Prattele jetzt e Schiibe?**

Au was mir nit für uns wänd bhalte
in Prattele het Big Brother izug ghalte
es Joor lang duett me Kamera teschte
s Ergebnis isch zum allerbeschte
schnell duett me no es Reglement mache
das isch eso bi gsetzliche Sache
drum sait dr Ali a dr 14 er Endstation blass
„Hey Dragan hesche gseh Kamera voll krass
jetzt mir nix mehr könne Sache demoliere
Kamera alles mache portraittiere.“
Und Dragan sait : „Ich grossi Angsthase
wenn Kamera uf Schlossstross den fertig mit rase
ich hoffe Prattele Lüt das scho vermiede
sunscht ich froge: **Hete Prattele jetzt eini Schiibe?**

Letschi simmer uf Basel gfahre
fahret grad richtig Autobahn mitem Charre
den hemer gmeint eus bisst e Made
links gsehmer e mega Glasfassade
uf dr andere Site ohni übertriebe
genau s gliche Schiibe nebe Schiibe
mir händ denkt das isch jetzt glunge
het über über unses Sujet gsunge
wege dere Firma chömer uns d`Händli riibe
so passt euses Sujet: **Het Prattele jetzt e Schiibe?**

A dr Hauptross isch au öbis passiert
das händ mir nonig ganz kapiert
sicher isch das au Euch bekannt
dört het eine e Buurehof mit Land
und duett de schnell, mir düends euch verzelle
eifach abrisse zum es Wohnhuus annestelle
doch das ganze, jetzt müender lose
goht für de Bauherr e bitzeli in d`Hose
will me findet dort ufem Grund
wertvolli Sache vermuetlich e Keltische Fund
drum isch nüt mit witergrabe
und es stoht still das Bauvorhabe
was eus duett störe am ganze dra
uf ei Schlag händ Cliquene kei Wagebauplatz me gha
mir froge drum het das müesse si
oder: **Het e Prattler jetzt e Schiibli?**

Jetzt wüsseter was mir mit dem Sujet meine
und jetzt no e Vers über uns aber en chleine
die Fasnacht werde mir ganz toll gniesse
und sicher wird de eint oder ander Wyssi fliesse
gsänder den gege Morge zue eine heimeschwanke
händer sicher de richtig Gedanke
düent den eifach bitte e frog vermiede
Het de Dorfplatzruech jetzt e Schiibe?